

2 KORÏTO

Paoro Iokanatsopatakiti Iuaĩkana Korïto Auakanimoni

1 ¹Nota Paoro, Xesosi Kristo iokanatakitino. Teoso nirekari iokanatinino kãkitimoni isãkire nisãpiretini ïkapani. Ia aãtsopa niõkatsopata. Aĩtari Tximótxio aua notakata. Ia iõkatsopari niokanata kãkiti Teoso mereëkinimoni, Korïto sitatxiti auakanimoni. Apaka ia iõkatsopari niokanata kãkiti Teoso nakitiakorimoni, Akaia tixini auakanimoni. ²Aĩri Teoso, Xesosi Kristo Apiananiri pakini sikari ikinipoko erekari hĩtemoni. Ikamaerekaxiniretai hĩte.

Teoso Mĩkapiritiniua Pirena

³Peerekari Teoso. Aãũte Xesosi Kristo iri itxaua. Kaamonĩkareri iua. ãti kãkiti amonĩkakareri iua atoko inakareri !auari. Amaerekaxinirenisaaiki, iua atekata aua. Amaerekaxinireni imaktxakinaua. Iuusaaki imĩkapiritaua. ⁴Imĩkapiritaua amaerekaxinirenisaaiki, ininiã apanakini maerekaxinirenisaaiki, iua atokotxikana ate mĩkapiritana ninoa apaka, kotxi aimarotari Teoso mĩkapiritiniua ate. ⁵Kristo iteene misiritaãka, ininiã ate misiritaãka apaka. Iua atokokana Teoso moianatari Kristo, ininiã iua moianataua ate apaka. ⁶Apanakini misiritaua, kotxi anirekari Teoso mĩkapiritinii hĩte. Anirekari Teoso maktxakiniri himaerekani. Teoso mĩkapiritaua ate, ininiã hĩte apaka imĩkapirita. Teoso mĩkapiritakasaakii hĩte, isikataparatai himisiritiko hĩpoxokoniritika himĩteenekini ïkapani. Hĩte misiritiko ate misiritiko atokokana. ⁷Aimarotapitikari erekari

Teoso sikinii hīte, kotxi himisiritaāka ate misiritiko atokokana, ininiā Teoso mīkapiritai hīte, ate imīkapiritini atokokana.

⁸Aītariakori, anirekari hīxinikiniri ate misiritiko Ásia tixini aāuakasaaki. Iuasaaki iteene amaxikaāka. Kona amīteenekari. Auākatari aōkiko. ⁹Iuasaaki aākixinireē atxa: “Apinapitikako,” atxa. Ikara atoko ininiā, aimarotari kona ate posotiire !auari. Aimarotari Teosonoka sikataparataua, kotxi iua posotari ōkitikiniri ipīkari. ¹⁰Pamonōkoniri iuasaaki, iuaritika Teoso makatxakaua amapinakani ĩkapani. Iua makatxakapanikaua amapinakani ĩkapani. Ate auikari iua sākire, iuaīkana imakatxakiniua tīkane. ¹¹Hīte moianataua ate, kotxi himisākiretari Teoso ate ĩkapani. Ininiā Teoso kamari hamanaākiti iaōka, kotxi Teoso kamari erekari atemoni. Eereka kaiāopokori kākiti sāpiretari Teoso iua ereka inini, kotxi ikamari ninoa amanaākiti iaōka ate ĩkapani.

Paoro Masikani Korītomoni

¹²Ate poxokoniuata, kotxi ate kamari erekarinoka Teoso oerekakitinoka, kākitimoni, hītemoni apaka. Atāonoka anireka akamini kākitimoni. Aimarotari ikara aākixinireē, ininiā apoxokoniuata. Ikara atoko aāuini, kotxi ikinipoko erekari Teoso sikakiti sikataparataua. Kākiti imaroreē liposotari ikaminiri iua auini ereka inini, kotxi !kiīkiteri kākiti. ¹³Hātatsopatakasaakiri aiōkatsopatakiti hītemoni, himarotari axinikakiti aākixinireē. Axinikakiti, asākire pakini ātinoka itxaua. ¹⁴Hīte na iteene imarotapanikaua ate, iuaritika ninirekari hīuikiniua ate, Apiananiri Xesosi uai ikanapiriini ōtisaaki, ate iuikini atokotxikana.

¹⁵Ikara nimarota, ininiā ninirekamari hītemoni nisini, ipikata hīpoxokoniuatini ĩkapani. ¹⁶Masetónia tixinimoni nisini apisapanika, ninirekamari hītemoni nisini. Eereka nikanapiriākasaaki uaimoni, ninirekamari hītemoni iuaīkana nisini, ininiā iuasaaki ninirekamari hīte iokanatinino nota Xotéia tōpamoni. Txamari na nisa. ¹⁷Atxiīti hīte txano nota: “Pixinikasaakiri uai papokini, na iteene pinirekari uai papokini,” hītxano. Txamari ninirekapitikari napokini hītemoni. Na nota xinikari Teoso sākire mauīākani xinikakiti atoko, kotxi ninoa sākire: “Ari, nisapitika,” txamari ākixinireē itxana: “Na nisapani,” itxana. ¹⁸Nota sākire hītemoni ninamaā: “Ari nisapitika,” ninakasaaki, nākixinireē apaka txari: “Ari, nisapitika,” nitxa. Teoso atāonoka sākirauatakarari imarotari ikara nisākire atāo inini. ¹⁹Sírasi

inakori, Tximótxio inakori, nota pakini sãpiretapekai hĩte Teoso ãkiri, Xesosi Kristo sãkire. Xesosi sãkire inamaã auakari, isãkire ãkixinireẽ auakaritxikana isãkireta. “Nikamapitikariko,” inakasaaki, ãkixinireẽ inirekapitikari ikaminiri. Ikamari isãkire iaõka. ²⁰Teoso sikaenetakiti kãkitimoni kaiãopokori aua. Iua Kristo sikaua ikinipoko Teoso sikaenetakiti, ininiãkara atxari: “Ameẽ.” Peerekari Teoso, kotxi Kristo sikapitikaua Teoso sikaenetakiti. ²¹Teosokara sikataparaxiniretai hĩte, ate apaka, Xesosi Kristo amatakanapakani ikapani. Teosokara mereẽua iua nakitiakori aniniua ikapani. ²²Apaka Teosokara sikaua Erekari Matamatakoti, Teoso nakiti aniniua aimarotini ikapani. Iua Erekari Matamatakoti aua aãkixinireẽ. Teoso takaõtxikare itxaua iua. Iua Erekari Matamatakoti merepitipanika Teoso sikakiti atemoni, ininiã aimarotari apikomoni isikapanikaua itanapoko inĩkatakiti ate ikapani.

²³Kona nisari hĩte Korĩto sitatxiti auakanimoni, kotxi kona ninirekari hĩte matinaniuatini hĩte maerekani nisãpiretini xika. Teoso imarotari ikara atão inini. ²⁴Hĩauĩte kona ate txaua. Kona apaniãtai: “Ia atoko inakari hãuika. Kona ikara atoko inakari kona hãuikape.” Kona ikara atoko !atxai hĩte, kotxi hĩte auikapitikari Teoso sãkire atão inakari. Aparĩkauata hĩtekata hĩpoxokoniuatini ikapani.

2 ¹Nãkixinireẽ nitxari: “Na nisa iuaĩkana ninoamoni nikamamatinanitinina ikapani.” ²Nota xika maerekaxinireninoka hininiã, kiripa kamapoxokinitano nota? Hĩtenoka aua nota kamapoxokonitakani. Ininiã kona nota nirekari maerekaxinireni hinini nota xika. ³Kona ninirekari hĩtemoni napokini, maerekaxiniretikano ninini, hĩte maerekani xika, ininiãkara nota iokanatsopatarari ikora mitxi niõkatsopatakiti hĩtemoni ereẽ napokini apisapanika. Kotxi nikamapoxokonitakini hĩtxaua hĩte. Nimarotari ia. Nota nienenĩkasaaki, hĩte himakinika eneniãka apaka. ⁴Niokanatsopatarari ikora niõkatsopatakiti hĩtemoni, kotxi himaerekani xika maerekaxiniretinoka nitxa. Nitxiapata. Niokanatsopatarari ikora niõkatsopatakiti hĩtemoni, iteene nitiretinii himarotini ikapani. Na ninirekari nikamamatinanitinii.

Maerekanitxi Maxinĩkaretiko

⁵Iua kiki maerekati kamakari maerekaxinireti txĩkitakano. Iua apia maerekaxinireti txĩkitakai hĩte, maerekati ikamini xika. Na iteene ninirekari nitxitiniri iua. ⁶Uatxa atokopeka homanatiniri. Iua txitaãkapeka imaerekani xika. ⁷Uatxa himaxinĩkaretariko maerekati ikamakiti, ininiã hãpakapariko iua. Himisãkiretariko

iu. Hîkamapoxokonitari iua. Ikara atoko himinakaniãri, iua kona erekaxinireri. Ikara atoko himinakaniãri, atxiïti itakanapari Teoso kimapore. ⁸Ininiãkara nota ôtãkikai hïte nitapararitika. “Atiretapitikai,” hïtxariko iua, hïtiretiniri imarotini ïkapani. ⁹Ininiã mitxi niokanatsopata hïtemoni, kotxi iusaaki nataerekatai hïte. Ninirekari nimarotiniri, hïkïpitatari nôtãkikinii atxiïti? ¹⁰Himaxinïkaretakasaakiri maerekati ãti kamakiti, nota apaka maxinïkaretari. Maerekati ãti ereë kamakiti auiniã, nimaxinïkaretari, kotxi nitiretai hïte. Kristo nirekari nimaxinïkaretiniri maerekati ikamakiti. ¹¹Axinikasaakiri maerekati ãti kamakiti, akamari Satanasi nireëkiti. Ininiãkara !akamari Satanasi nireëkiti. Paimatireri iua. Inirekari akerokiniri. Aimarotari iua nireëkiti, ininiã apia imatirerini matxaua.

Txito Paoro Nitini

¹²Tóatxi sitatxiti napokasaaki Kristo iokanapirena erekari nisãpiretini tïkane, kãkiti iuaã auakani nirekari nisãkire imarotinina, kotxi Apiananiri sikanireõtana nisãkire imarotinina ïkapani. ¹³Iuaritika !erekaxinireno, kotxi ninitapiimari aïtari Txito inakori. Kona napokari. Ininiã nitakapiretanapana kãkiti iuaã auakani: “Ereëpiko. Masetónia tixinimoni nisako,” nitxana.

Kamariãro Atoko Atxa

¹⁴Peerekari Teoso kamakiti ate ïkapani. Kristo nakiti aniniãua, Teoso txïkitakaua ãtipirika akãiatini, ikinimane imarotini ïkapani. Teosokata akãiata. Teoso paniãtaua Kristo pirena imarotiko ikini tõpati iaripiretini, kamariãro iarikatxiãtini atokokana Kristo pirena iaripiretini ïkapani. ¹⁵Kristo sikaua Teosomoni, ininiã Teoso apokaerekataua, kotxi kamariãro arikiko Teoso ïkapani atokokana atxa. Kamariãro arikasaaki omari samariãpota ikini tõpati. Iua atokokana asaãpota kãkitimoni, kãkiti apokakonimoni, kãkiti pïpinanaãkanimoni apaka. ¹⁶Kãkiti pïpinanaãkanimoni kanaiatxiãri atoko atxa, kotxi asãpiretana Kristo sãkire imauikakaniãna, ipinana. Kãkiti Teoso apokakinimoni kamariãro eretxiãro atoko atxa, kotxi asãpiretana Kristo sãkire auikiniãna, auapininiika itxanako Teosokata. Kiripa posotari ikara atoko inakari parïkatxi ikamini Teoso ïkapani? ¹⁷Ate posotari Teoso ïkapani aparïkauatini, kotxi kona apanakini atokoni !atxa ate. Kaiãopokori kãkiti sãpiretari Teoso sãkire txineiro apakapini ïkapani. Ninoamoni Teoso sãkire tiitxi vëtxitiko atoko itxa. Kona

ikara atokoni !akama, kotxi Teoso iokanataua ate kãkitimoni. Teoso atamataua, ininiã atãonoka asãkirauata, kotxi Kristo nitiriakori atxaua.

Iøkatsopari Atoko Hĩtxa

3 ¹Atxiĩti iuaĩkana ate sãpiretatari erekari akamakiti asãkire hãuikini ĩkapani? Atxiĩti hinirekatari apanakini iøkatsopatiniri erekari ate kamakiti ate sãkire hãuikini ĩkapani? Atxiĩti ate nirekatari apanakini iøkatsopatiniri erekari hĩte kamakiti hĩte sãkire ate auikini ĩkapani? Apanakini kamari ikara atoko. Ate kona kamari ikara atoko. ²Kona ninirekari iøkatsopari ikara atoko inakari, kotxi iua iøkatsopari atoko hĩtxa hĩte. Ate ãkixinireẽ iøkatsopari atoko hĩtxa. Ikinimane atatsopitari ikara iøkatsopari, ininiã imarotarina erekari hĩte kamakiti. ³Iøkatsopari Kristo iøkatsopatakiti ate mĩkiti atoko hĩtxa. Kona txĩtaã iøkatsopataãka. Erekari Matamatakoti Teoso Mapinakati iøkatsopitari. Kona aãtsopaã iøkatsopataãka. Kãkiti ãkixinireẽ iøkatsopataãka.

⁴Ikara atoko atxai hĩte, kotxi iteene aimarotari Teoso, Kristo nakitiakori aniniua. ⁵!Kimaroreua ate. Ateka !apostatari aparĩkauatini Teoso ĩkapani. Teosora sikaposotiiretaua. Isikari imarore atemoni. ⁶Isikaposotiiretaua Teoso ĩkapani aparĩkauatini ĩkapani, isãkire amaneri kãkiti asãpiretini ĩkapani. Ikara isãkire amaneri oerekaua Erekari Matamatakoti aãkixinireẽ auini. Isãkire amaneri !oerekaua ipaniãtakiti iøkatsopatakori Moisesimoni isikakiti. Ipaniãtakiti iøkatsopatakori Moisesimoni isikakiti paniãtari kãkiti ipinini imaerekani xika. Erekari Matamatakoti aãkixinireẽ auiniã, itxĩkitakaua aãuapininiika anini.

Teoso Parĩka Amaneri

⁷Teoso paniãtakiti tesi pakini iøkataãka kai nopini. Teoso sikasaakiri ikara Moisesimoni, Teoso iotximere iteene aua. Moisesi toõ iuasaaki apakapari Teoso iotximere. Itene iotximere aua Moisesi toõ, ininiã kãkiti Isaeo auakani kona posotari atamatiniri. Iotximere poiãõpotakasaaki, liposotapanikarina itoõ atamatinina. Ininiã Teoso iotximere auakasaaki, isãkire iøkatakori apoka itiximoni kãkiti ipinini ĩkapani. ⁸Uatxa iua Erekari Matamatakoti txĩkitakari kãkiti ãtipirika auini ĩkapani, ininiã uatxa Teoso parĩka apiata. Peerekari ikara iparĩka. ⁹Peerekari Teoso parĩka ipaniãtakiti iøkatakori kãkitimoni isikasaaki, txamari iuasaaki oerekari kãkiti misiritiko imaerekani xika. Uatxa Teoso parĩka apiaerekata, kotxi

Kristo kamaerekatari kâkiti. ¹⁰Uatxa Teoso parîka apiata. Peerekari. Iotximere apiari atoko itxa, ininiã iua parîka kitxakapirîka iotximere napakari atoko itxa. ¹¹Kitxakapirîka Teoso parîka ipaniãtakiti iökatakori isikasaaki peerekari, txamari ikara Teoso parîka xipope. Ìkorasaaki iparîka kâkiti ikamaerekatini !ixipoka, ininiã apiaerekata.

¹²Ia Teoso parîka !ixipoka, ininiã ataparaxinireritika asãkirauata. ¹³Moisesi atoko !atxaua, kotxi iua ipatoõtua mãkatxi mataã, itoõ iotximere Isaeo auakani matamatakani ìkapani. Itoõ iotximere poiãota, iuaritika !iposotarina atamatinirina. ¹⁴Moisesi ipatoõtiniua atokokana ninoa Isaeo auakani oki ipataãka, kotxi !imarotarina atão Teoso nireëkiti. Uatxapiima okina ipataãkapanika atatsopatakasaakirina Teoso sãkire iökatsopatakori, Xesosi apokini apisapanika auakari sãkiretxiti. !imarotarina Teoso nireëkiti. Kristo sãkire auikikosaaki, iua ipatoõtiko makatxakaãka, ininiã iuasaaki kâkiti imarotari Teoso nireëkiti. ¹⁵Ìkorasaaki apaka Moisesi iökatsopare atatsopatakasaakina, !imarotarina. Okina ipataãkapanika. ¹⁶Kâkiti akiritakasaakiri Apiananiri, ipatoõtiko makatxakaãka. ¹⁷Erekari Matamatakoti itxaua Apiananiri. Erekari Matamatakoti auiniã aãkixinireë, !aparîkauataika amaerekani makatxakiko ìkapani, kotxi Xesosi makatxakapekari amaerekani. ¹⁸Xesosi sãkire auiãkani atxaua, ininiã atoõ kona ipataãka. Ìtakaãri atoko atxaua. Kâkiti atamatakasaakiua ate, atamatari Apiananiri iotximere. Apiananiri Erekari Matamatakoti aãkixinireë txïkitakaãpotaua ikara atoko aniniua, ininiã apiaãpota aiotximere.

Teoso Iokanapirena Erekari Pokamara Atoko Itxa

4 ¹Teoso amonîkaua ate, ininiã iua paniãtaua ia parîkatxi akamini, iokanapirena erekari apanakinimoni asãpiretini. Ikara atoko ininiã, isikataparaxiniretaua, ininiã !anirekari atakanapiniri ikara parîkatxi. ²Kâkiti kipatari ikamakiti, maerekati ikamakasaaki, kotxi ipëtaua. Ikara atoko inakari maerekati !akamaika. Atakanapapekari. !Amisirienetari kâkiti. Kona akoketari ate sãkire Teoso sãkirekata. Teoso kenakotari asãkire, ininiã atãonoka asãkire, ininiã kâkiti ãkixinireë imarotari akamakiti atão inini. ³Kâkiti mimarotakanisaakiri Teoso iokanapirena erekari asãpiretakiti, kâkiti pîpinanaãkari atoko itxa. ⁴Kâkiti pîpinanaãkari !imarotari Teoso iokanapirena, kotxi kâkiti teosone, Satanasi inakori, ipatari ninoa oki, ininiã !atamatarina pokamara ninoa iopiniãkari. Teoso iokanapirena erekari pokamara atoko itxa. Peerekari ikara

Teoso iokanapirena. Iua erekari pirena sãpiretari Kristo Apiananiri ininiua, kotxi Teoso itxaua. ⁵Ate kona sãpiretari kãkiti ateka pirena. Ate sãpiretari Xesosi Kristo Apiananiri ininiua. Ate hĩte nitiriakori atxaua, kotxi Xesosi nirekari hinitiriakori aniniua. ⁶Kitxakapirĩka ipiãnoka auakasaaki, Teoso txari: “Piopinikaxitita.” Iuasaakipeka iopinikaxitita. Iua Teosotxikana iopinikari aãkixinire. Ikara iopinikare kamaimaroretua Teoso Apiananiri kaiotximereri ininiua. Kristo aãtamatakasaaki, aãtamataru Teoso iotximere.

Xesosi Sãkire Auiãkani Misiritiko

⁷Kopiti maikoti atoko atxaua, kotxi atapara !uari. Iuaritika atemoni auari Teoso iokanapirena erekari katireri. Ininiã aimarotari Teosonoka kaposotiireri, kataparari ininiua. Atepekana !aposotari. Atapara !uari. ⁸Asinimoni amaxikakini aua, iuaritika !okaua ate. Atxiĩti !aimarotari akamakiti tĩkane, iuaritika kona aiotokakari Kristo sãkire aãuikini. ⁹Amisiritiko aua, iuaritika Teoso kona takanapaua ate. Atxiĩti akarotaãka, iuaritika kona aõkaãka. ¹⁰Ikiniõtika aĩto okiko monõkoni aua Xesosi sãkire aãuikini xika. Xesosi atatsiirauata. Ipina. Iua atokotxikana ate atatsiirauata. Atxiĩti aĩto ipina iua sãkire aãuikini xika. Xesosi auapika, kotxi ipĩpe, eereka õkitikaua, ininiã iua atokokana aĩto auapika. ¹¹Auapanika anakasaaki, aõkiko monõkoni aua Xesosi sãkire aãuikini xika. Aĩto ipinapitikako, iuaritika aãuapanika, kotxi Xesosi auapanika. ¹²Xesosi iokanapirena asãpiretini xika, apanakini nirekari okiniua ate. Xesosi iokanapirena asãpiretakasaakii, hĩte auikari, ininiã hĩte auapika himaxipokakani.

¹³Teoso sãkire iõkatsopatakori txari:

Nota auikari Teoso sãkire, ininiã nisãpiretari kãkiti. Iua atokotxikana ate auikari Teoso sãkire, ininiã ate sãpiretari kãkiti. ¹⁴Teoso õkitikari Apiananiri Xesosi, iuaĩkana auini ĩkapani, ininiã aimarotari Teoso õkitikiniua ate apaka, iuaĩkana aãuini ĩkapani. Eereka Teoso anikauako ate hĩtekata Xesosi aaõkitini Teoso apisatoõ. ¹⁵Amĩteenekari ikinipoko amisiritiko Xesosi sãkire hĩtemoni asãpiretini ĩkapani. Kãkiti apikomoni, apikomoni, apikomoni, txaãpota apakapari ikinipoko erekari Teoso sikakiti, ininiã ninoa kãkiti kaiãopokori txari Teoso: “Erekapitikari pisikakiti notamoni.” Ikara atoko ininiã, kãkitipokoni txari: “Peerekari Teoso,” itxako.

Maerekaxinireni !Atxaua

¹⁶Ininiākara maerekaxinireni !atxaua. Aĩto xipokaãpota, iuaritika aãkixinire ikiniõtika apiataparaãpota. ¹⁷ĩkorasaaki amaxikiko auapitika Xesosi sãkire aãuikini xika. Kona okanani auu amaxikiko. Eereka Teosokata ãtipirika aãuapika, kotxi aãuikari isãkire. Peerekari iuasaakiko. !Axinikaikari mitxi amaxikiko, kotxi iuasaakiko peerekari. ¹⁸Kona amaãkatari aãtamatakiti. Amatamatakiniti axinika. Atamatakori xipokako. Matamatakoti kona xipoka.

Aãuapoko Teoso Tixineẽ

5 ¹ĩkorapokoriti aãuakasaaki, aĩto aãuapoko itxaua aãkixinire ĩkapani. Aĩti õti aĩto xipoka. Ixipokasaaki, Teoso sikari ãtião aãuapoko. Iua aĩto isikaua, itixine aãpokasaaki. Iua aĩto kona xipokaika. Iua aãuapoko kona uakõtxiã kamakorini. ²ĩkorasaaki aãtatsiirauatakasaaki, atxari: “Ninirekari ãtião niĩto, niĩto Teoso sikakiti itixine napokasaaki.” ³Anirekari ãtião aĩto, ininiã maĩtotika !atxaua. ⁴ĩkorasaaki ia aĩto auapanika inakasaaki, aãtatsiitari katsiiri. Kona kataparari ia aĩto. Anirekapitikamari aĩto. Anirekari ãtião aĩto, ininiã aĩto maxipoãkati makatxakari aĩto xipoãkari. ⁵Teoso kamari aĩto maxipoãkani ĩkapani. Isikapanikauako aĩto ikara atoko inakari. Aimarotari ikara atão inini, kotxi isikapekari Erekari Matamatakoti atemoni. Ipixini Teoso sikaenetakiti isikapekua, ininiã apikomoni isikaenetakiti isikapitikauako.

⁶Ininiã kataparaxinirepitikaua ate. Aimarotari aãuapoko ia aĩto ininiãua, kona aãpokapanika Apiananiri tixinemoni. ⁷Xesosi sãkire auikiko oerekaua atão aãuini tĩkane. Aõkinoka kona oerekaua atão aãuini tĩkane. ⁸Kataparaxinirepitikaua ate. Kona ate pĩkari apinini. Apiaerekata apinini, kotxi iuasaakiko Apiananirikata aãua. ⁹Anirekari amiinitiniri Apiananiri, ia aĩto ãki aãuakasaaki, ia aĩto xipokasaaki apaka. ¹⁰Ãti õti ate amakinika sariko Kristomoni. Iuasaaki Kristo sãpiretaua aparĩka ĩki. Iua imarotari ikinipoko akamakiti ia aĩto ãki aãuakasaaki. Atxiĩti akamari erekari. Atxiĩti akamari maerekati. Akamakiti iaõka isikaua aparĩka ĩki.

Kākiti Mikanapiriĩko Teosomoni

¹¹ Aimarotari Apiananiri katapara inini, kotxi imisiritari kākiti imaerekani xika. Ininiã asāpiretari kākiti auikiniri iua sākire. Aparĩkauata, iua sākire kākiti auikini ĩkapani. Teoso iteene imarotaua. Imarotari axinikakiti aākixinireẽ. Ninirekari hĩte apaka iteene imarotiniua ate hākixinireẽ. ¹² Kona ate nirekari iuaĩkana asāpiretinii hĩte ereka anini. Anirekari asāpiretinii, apakatapitika hũuikiniua ate, kotxi atāonoka akama. Ikara atoko inakari himarotiniã, himarotari kākiti hāpakapapiretini, ninoa misākirepiretakasaakiaua ate. Ninoa kākiti ate misākirepiretakani iuikari atamatakorinoka. Kona imaākatari kākiti ākixinire ereka inini. ¹³ Atxiĩti kākitimoni kona kiĩkiteua ate. Ikara atoko atxa Teoso ĩkapani. Atxiĩti paĩkiteua ate. Ikara atoko atxa hĩte ĩkapani. ¹⁴ Kristo iteene tiretaua, ininiākara anirekari iua nireẽkiti akamini, kotxi aimarotari iua ipina ikinimane ĩkapani, kotxi ikinimane ipĩkani atoko itxauana. ¹⁵ Kristo ipina ikinimane kākiti ĩkapani, kākiti mapinakani ĩkapani, kākiti ātipirika auini ĩkapani. Ininiã iua kākiti kona kamaikariko iuaka nireẽkiti ikiniõtika. Ikamariko Kristo nireẽkitinoka, kotxi Kristo ipina iua ĩkapani. Iuaĩkana õkitikapekaua.

¹⁶ Ininiã uatxa !axinikaikari kākiti ĩkorapokoriti auakani xinikakiti atokokana. Mitxi axinikari Kristo ninoa xinikiniri atoko. Uatxa !axinikaikari Kristo ninoa xinikiniri atoko. ¹⁷ Kristo sākire auiaĩkari ākixinire amaneri itxaua. Mitxi maerekati ikamakiti kona ikamaika. Amanerinoka ikama. ¹⁸ Ikara atoko inakari Teosora kaminaua. Mitxi amokaiakari atoko itxa Teoso, iuaritika imikanapiriãua ate iuamoni, kotxi Kristo ipina ate ĩkapani. Ipaniãtaua ate asāpiretiniri ikinimane kākiti, Teoso nirekari imikanapiriinina ninoa iuamoni. ¹⁹ Teoso mikanapiriãri kākiti ikini itixiti auakani iuamoni, kotxi Kristo ipina kākiti ĩkapani. Teoso mikanapiriãkasaakiri kākiti iuamoni, kona iaõtari maerekati ikamakitina. Kona ixinikaikari imaerekanina, ininiã kona imisiritana imaerekani xika. Ia pirena, kākiti imikanapiriini pirena, ipaniãtaua asāpiretiniri ikinimane kākiti.

²⁰ Asāpiretari Kristo sākire kākitimoni. Asākirauata iua ĩkapani, ininiã Teoso iteene õtākikai hĩte ate sākireẽ. Kristo nireẽkiti iaõka ate õtākikai hĩte. Hikanapiriãko Teosomoni. ²¹ Kristo kona kamari maerekati, iuaritika Teoso misiritari iua maerekati kamakari imisiritini atokokana. Ininiã Xesosi sākire aũuikiniã, Teoso apakapaua ate, maerekati makamakani apakapini atoko, kotxi iua kamaerekataua ate.

6 ¹Ate parīkauata Teosokata, ininiā ate iteene ōtākikai hīte. Teoso sikari ikinipoko erekari hītemoni, ininiā !apakata mamaākatakinitika hininiri Teoso. ²Kotxi Teoso sākire iōkatsopatakori txari:

Erekari kākitimoni nisika. Niketo apokasaaki, iusaaki nikenakotari hākiritinino nota. Kākiti maerekani nimakatzakini ōtisaaki, nimoianatai hīte.

Nisāpiretai. Uatxa apokapeka Teoso keto erekari kākitimoni isikini. Uatxa Teoso makatzakari kākiti maerekani.

Teoso Nitiriakori Atāo Inakani

³Kona xatiki akerokari akamakiti kākitimoni, ininiā kākiti kona txari: “Ninoa kerokari ikamakitina, atāo minakati isāpiretinia,” !itxana. ⁴Teoso nitiriakori atāo atxaua. Aāuini ikiniōtika oerekari kākiti Teoso nitiriakori atāo inakani aniniua, kotxi amīteenekari amaxikiko. Amīteenekari amisiritiko. Amīteenekari katsiiri. ⁵Teoso nitiriakori atāo atxaua, kotxi Teoso parīka akamini xika anoropataākapeka. Kateia āki atakaākapeka. Ahoaātaā kākiti apotiitakaniua naiatapekaua. Teoso parīka akamini, pasāpaniri aparīka. Itokata !aimaka. Itokata anatxita. ⁶Kākiti imarotari ate Teoso nitiriakori aniniua, kotxi kona akamari maerekati. Aimarotari Teoso sākire. Kona katimari aomanākarauatini. Amoianatari kākiti. Erekari Matamatakoti oerekaua atāo akamini. Atāo atiretari kākiti. Ikara atoko aniniā, kākiti imarotari Teoso nitiriakori aniniua. ⁷Ate Teoso nitiriakori atāo atxaua, kotxi atāo inakarinoka asāpireta. Teosora sikaposotiiiretaua. Erekari akamakiti aīkeeko akikomoni, asanaremoni pakini atoko itxa, kotxi erekari akamakasaaki, maerekati iokanataāka. ⁸Teoso nitiriakori atxaua, ininiā apanakini kākiti paxitaua. Txamari apanakini kākiti kona paxitaua. Apanakini sākire: “Peerekana ninoa.” Txamari apanakini sākire: “!Erekana ninoa.” Apanakini sākire: “Kamisirienererini ninoa,” iuaritika atāo inakarinoka asākire. ⁹Minakaniua ate, iuaritika ikinimane imarotaua. Kaiōokatani apinaarita, iuaritika aāuapanika. Amisritaāka, iuaritika kākiti kona okapanikaua. ¹⁰Amatinaniuatakasaaki, Apiananiri kamapoxokonitaua ate. Kona katxineiroteua ate, iuaritika atxīkitakari kaiōopokori kākiti ikini sereti erekari Teoso sikakiti apakapinina. Minakani atxaua, iuaritika ikinipoko erekari Apiananiri sikakiti aua atemoni.

¹¹Hīte Korīto sitatxiti auakani asāpiretai ikinipoko axinikakiti. Nikipatakiti !auari. Iteene atiretai hīte. ¹²Ate nirekari atiretinii hīte,

txamari kona hĩte nirekari hĩtiretiniua ate. ¹³Uatxa nimisākiretai hĩte namariteakori nimisākiretini atokotxikana. Hĩtiretauako ate, ate tiritinii atokotxikana. Hõerekaua hĩtiretiniua ate.

Xesosi Sākire Mauiākani Moianariakori !Hĩtxapeua

¹⁴Xesosi sākire mauiākani moianariakori !hĩtxapeua, kotxi !apakata erekari kaikotini maerekatikata. !Apakata pokamara ĩkanõkarikata auini. ¹⁵Kona Kristo moianatari Satanasi. Xesosi sākire auiākari nireēkiti āti. Xesosi sākire mauiākati nireēkiti ātiāo. Ininiā !apakata Xesosi sākire auiākari auini Xesosi sākire mauiākatikata. ¹⁶Teoso misākiretiko aikoti āki !uari kākiti kamakiti teoso. Aĩto Teoso misākiretiko aikoti atoko itxa. Teoso ātipirika auakari itxaua. Iua txari:

Nota auako ninakitiakorikata. Nitĩpokota ninoa sauaki. Ninoa Teosone nitxauako. Nota nakitiakori itxauanako ninoa.

¹⁷Ininiākara hĩtakanapanako nisākire mauiākani. Kona ninoakata !hãuape. !Hĩkaikotape maerekati takote, ininiã napakapai hĩte.

¹⁸Ininiã hĩri nitxauako. Namariteakori, namariteakoro hĩtxauako hĩte, itxa Apiananiri, Kaposotiireri sākire.

7 ¹Nitiretakini ikara atoko itxa Teoso kamaenetakiti ate ĩkapani. Ininiã matakanaipari ikinipoko maerekati aĩto txikotakari, aākixinire txikotakari pakini. Teoso nakitiakorinoka matxaua. Erekarinoka makama Teoso apaxitini.

Paoro Poxokoni

²Hĩtiretauako ate. Kona amisiritari kākiti. Kona aõerekari kākiti maerekati ikamini. Kona amisirienetari kākiti. ³Kona ikara atokoni nitxa hĩte nitxitini ĩkapani. Kona nitxitai, kotxi nisãpiretapekai iteene atiretinii hĩte. Ininiã ipĩkitxi kona oiarikaua. Auakari kona oiarikaua. Ate oiarikakari !uari. ⁴Nimarotari hĩte kaminiri nota õtãkikakiti iaõka. Nota iuikai hĩte. Hĩte kamataparaxiniretano nota. Amaxikaãkapika, iuaritika iteene nipoxokoniua.

⁵Masetõnia tixini ate apokasaaki, kona aiotoka. Kona atomata, kotxi asinimoni aua kākiti ate misiritakani. Kākiti naiataua. Aākixinireẽ apĩkarauata. ⁶Teoso, mĩkapiritari kākiti matinaniuatakani, ininiã imĩkapiritaua ate Txito apokasaaki. ⁷Iua apokini kamapoxokonitaua. Apaka isākire kamapoxokonitaua, kotxi isãpiretaua hĩte kamapoxokonitiniri iua. Isãpiretaua ate hĩte kinirão aõkitaka ininino nota. Isãpiretaua, hĩte maerekaxinireni,

kotxi hĩtxĩkitakano maerekaxinire ninini. Isãpiretaua hĩte ãtipirika sãpiretiniri apanakini nota kamakiti ereka inini. Txito sãpirena nikenakotakasaaki, apia nipoxokoniuaata.

⁸Mitxi niokanatsopatakiti hĩtemoni maerekaxinireti txĩkitakai hĩte, iuaritika erekari niokanatiniri iua niõkatsopatakiti hĩtemoni. Merepanika nota matinaniuata, kotxi nimarotari niokanatsopatakiti hãtatsopatini xika hĩte matinaniuata. Mapaõtinoka maerekaxinireni hĩtxaua. ⁹Uatxa poxokopekano nota. Na nipoxokoniuaata hĩte maerekaxinireni nitxĩkitakini ĩkapani. Nipoxokoniuaata, kotxi maerekaxinireni hinini xika, hĩtakanapari maerekati hĩkamakiti. Iuasaaki hĩkanapiriã Teosomoni. Teoso apokaerekatari ikara atoko inakari himaerekaxinireni, ininiã kona ate misiritai. ¹⁰Erekari Teoso txĩkitakiniri kãkiti matinaniuatini, kotxi iuasaaki kãkiti takanapari maerekati ikamakiti. Ikanapiriã Teosomoni, ininiã Teoso makatxakari iua maerekani. Ikara atoko inakari matinanitxi erekari. Txamari kãkiti Teoso manirekakani matinani ãtiãõ, ininiã ninoa ipinapikako. ¹¹Hĩte matinaniuata himaerekani xika, ininiã Teoso kamaerekatai. Ininiãkara uatxa erekarinoka hinireka hĩkamini. Uatxa iteene hinirekari hĩkaminiri Teoso nireẽkiti. Hinirekari ikinimane imarotiniri hĩkamakiti ereka inini. Uatxa homanatarari maerekati mitxi hĩkamakiti. Maerekaxinireti hĩtxaua himaerekani xika. Uatxa iteene hĩtiraõki aua. Hinirekari himarotiniri nota pirena, nota ereka ninini himarotini ĩkapani. Uatxa hinirekari maerekati kamakari misiritiko. Ininiãkara kona hĩkerokari, iua kiki maerekati ikamakasaaki.

¹²Iua iõkatsopari mitxi niokanatakiti hĩtemoni, niõkatsopata hĩte ĩkapanikara. Kona iua maerekati kamakari ĩkapanini niokanatsopata. Kona iua maerekati kamakari misiritakiti ĩkapanini niokanatsopata. Niokanatarari iua iõkatsopari hĩtemoni atiraõki himarotini ĩkapani. Teoso imarotari atiretinii.

¹³Ininiã ate kamataraxiniretaãka, kotxi hĩte kamataraxiniretaãka apaka. Apaka apoxokoniuaata, kotxi Txito poxokoniuaata. Iua poxokoniuaata, kotxi hĩte himakinika kamapoxokonitari iua. ¹⁴Txito hĩtemoni isini apisapanika, nota sãpiretari iua niuikinii hĩte, kotxi peerekai hĩte. Atãõ nisãkire, kotxi kona nipẽtauaata hĩkamakiti xika, kotxi hĩkamakiti atãõ. Atãõnoka asãkire hĩtemoni. Atãõnoka asãkire Txitomoni apaka ate iuikinii hĩte. ¹⁵Apiaãpota Txito tiretinii, kotxi hĩkamari iua sãkire iaõka. Imarotari hãpakapiniri iua hĩpaxitiniritika. ¹⁶Nipoxokoniuaata, kotxi nimarotapitikari hĩkaminiri nõtãkikinii iaõka.

Txineiro Apanakini Sikakito

8 ¹Nitariakori, anirekari asāpiretinii Teoso misākiretikoōtaā apotiitakaniua Masetónia tixini auakani. Peerekari Teoso kamakiti ninoa ĩkapani, kotxi ikinipoko erekari isika ninoamoni. ²Ninoa ĩteene kauarena. Pasāpaniri ninoa misiritiko, iuaritika ienenĩkana ninoa. Na katxineiroteni, iuaritika ipotxitarina itiina isikinina kākiti kaamonirinimoni. ³Nota imarotari ninoa minakati auiniāna, isikarauatana apanakinimoni. ĩteene isikarauatana, ininiā kaiōokatani inatxitana. ⁴Nota kona amanaāri ninoa txineirote kākiti Teoso nakitiakori Xerosareē sitatxiti auakani ĩkapani, iuaritika ninoaka txano: “Ate nirekari txineiro asikini ninoamoni. Pauritaua asikiniro ninoamoni. Asikiniāro apoxokoniuata, kotxi ikara atoko akamini amoianatari kākiti Teoso nakitiakori,” itxana. ⁵Kona ikarananini ninoa nireka. ĩteene ninoa kamapoxokonitaua ate, kotxi mitxipe ninoa txaua: “Ate nirekari Apiananiri nireēkiti akamini,” itxana. “Īua oerekiniāri inireēkiti hĩtemoni, ate nirekari hĩte paniātakiti apaka akamini,” itxana Masetónia tixini auakani. ⁶Txito amanaāpekai hĩte txineiro hĩsikini Xerosareē sitatxiti auakani ĩkapani, ininiā apaniātari iua sini hĩtemoni hĩsikakiti apakapini ĩkapani, hĩtiraōki ninoa Teoso nakitiakori hōerekini ĩkapani. ⁷Hĩte ĩteene auikari Xesosi sākire. Apanakini poiāoka. Hĩte imarotari Xesosi sākire hĩsāpiretini kākitimoni. Apanakini na ĩteene imarotari. Hĩte ĩteene imarotari Xesosi sākire. Apanakini poiāonoka imarota. Hĩte ĩteene nirekari Teoso parĩka hĩkamini. Apanakini poiāonoka nirekari. Hĩte ĩteene tiretaua ate. Apanakini poiāoka tiretaua. Hĩte apiaerekata, ininiākara ninirekari hĩsikakiti apaka apiari inini, kotxi ikara atoko hĩkaminiā, hōerekari Xerosareē sitatxiti auakani hĩtiretinina.

⁸Kona nipaniātai nitapararitika hĩsikiniro hĩtxineirote ninoamoni. Nataerekatari hĩtiraōki. Atāo atxiĩti hĩtiretari apanakini? Masetónia tixini auakani atāo tiretari apanakini. Hĩte tiraōki ninoa tiraōki atoko atxiĩti? ⁹Himarotari Apiananiri Xesosi Kristo sikari ikinipoko erekari hĩtemoni. Itanapoko auiniri Xesosi Teoso tixine auakasaaki. Iuaritika itakanapari ikinipoko. Minakati mauakinitinoka itxapeka hĩte ĩkapani. Ininiākara ikinipoko itakanapini xika, ikinipoko aua hĩtemoni.

¹⁰Uatxa nota ōtākikai hĩte, erekari hĩkaminiri hĩsākire iaōka, kotxi kita anokanani hĩte merepanika xinikari: “Natokopa itxa akaminiri Xerosareē sitatxiti auakani ĩkapani?” hĩtxa. Hĩte merepanika nirekari txineiro hĩsikinina ninoa. ¹¹Ininiā nōtākikai

uatxa. Hîkamariko mitxi hîsâkire iaôka. Hîpoxokoniritika hinirekariko hîokanatiniro txineiro ninoamoni, ininiã erekari hîpoxokoniritika hîkaminiri hîsâkire iaôka. Ipixini txineiro hîtemoni auakaro hîsikako ninoamoni. ¹²Hîpoxokoniritika hinirekiniãri hîsîkarauatini Teosomoni, iua apakapapitikari hîsikakiti. Poiãoka auiniãi, ininiã erekapitikari poiãonoka hîsikini Teosomoni. Iua apakapapitikari. Iua imarotari !apakata apikomoni hîsikiniri.

¹³Kona ate nirekari hîte kaamoni hinini, ikinipoko ninoamoni auini îkapani. Erekari ninoa auakiti hîte auakititxikana. ¹⁴Uatxa hîte txineirote auapitika ninoa hîsikini îkapani. Âti ôti hîte txineirote mauakanisaaki, atxiîti ninoa txineirote aua, ininiã ninoa sikai hîte. Ininiã hîte moianatinina atokotxikana, ninoa moianatai hîte. Ikara atoko inakari atão. ¹⁵Teoso sâkire iôkatsopatakori txari:

Kiki kaiãopokori apakapakari itetakori !auari. Kiki poiãoka apakapakari !kaamoniri.

Txito Iokanatiko Korîtomoni

¹⁶“Peerekai,” atxari Teoso, kotxi iua sikanireôitari Txito itiretinii hîte, nota tiretinii atokotxikana. ¹⁷Txito nirekapitikari ate paniãatakiti ikamini, hîtemoni isini. Apaniãtiniri apisapanika, inirekari hîtemoni isini, ininiã ipoxokoniritika isa hîtemoni. ¹⁸Aiokanatarari âti aîtari iuakata. Ikinimane Teoso misâkiretikoãtaã apotiitakaniua iteene apokaerekatarari iua, kotxi isãpiretarari Teoso iokanapirena erekari ikinimanemoni. ¹⁹Ninoa mereëri iua aîtari atekata isini Xerosareëmoni, oa txineiro aanikasaaki. Oa txineiro asikakito oerekana Xerosareë auakani Apiananiri ereka inini. Oerekana apoxokoniritika amoianatinina.

²⁰Oa txineiro kaiãopokoro aua, ininiã iua aîtari siniã atekata, iua imarotari atão asikiniro oa txineiro Xerosareë auakanimoni. ²¹Anirekari atão akamini oa txineiro asikasaaki ninoamoni. Anirekari Apiananiri imarotininiri atão akamini. Anirekari kãkiti apaka imarotininiri atão akamini.

²²Iuaîkana aiokanatarari âtipekana aîtari hîtemoni. Aãtaerekatapekari iua. Ipoxononiritika imoianatarari kãkiti. Apiapoxokonita iua, kotxi imarotari hîte kaminiri mitxi hîsâkire iaôka. ²³Txitopekana, nota moianari itxaua. Iua miparîkatano nota, hîte amoianatini îkapani. Xesosi sâkire auiãkani mereëna aîtariakori Txitokata sikani hîtemoni. Kãkiti imarotakasaakina ninoa, “Peerekari Kristo,” itxana kãkiti.

²⁴Ininiākara hõerekanako ninoa kikiakori atão hĩtiretinina, ininiã ikinimane Xesosi sãkire auĩākani imarotari atão hĩtiraõkiuatini. Iuasaakiko ninoa imarotari ate sãkire atão inini ate iuikinii hĩte.

9 ¹Nisãpiretai hĩte txineiro asikakito tĩkane Teoso nakitiakorimoni, Xerosareẽ auakanimoni. Nimasãpiretakaniãĩ hĩte, iuaritika hĩte nirekari hĩtxineirote hĩsikini ninoamoni. Nimarotari ikara.

²Nimarotari iteene hinirekari himoianatinina ninoa. Nitxapekana Masetõnia tixini auakani: “Nota iuikana aĩtariakori Korĩto sitatxiti auakani, Akaia tixini auakani, kotxi kita anokanani ninoa iposope txineiro iokanatinina Xerosareẽmoni,” nitxana. Hĩte poxokoni txineiro hĩokanatini, sikanireõtana Masetõnia tixini auakani apaka iokanatiniro txineiro. ³Uatxa niokanatanana ninoa aĩtariakori ipi ãti pakini hĩtemoni. Hĩte iposope hininiã hĩtxineirote hĩokanatini, erekapitikari, kotxi ikara nisãkire iaõka. Ininiã atão ate iuikinii hĩte. ⁴Masetõnia tixini auakani siniã notakata, hĩtxineirote miposonitipanika, ininiã ate pẽtauata, kotxi ate auikari hĩsãkire. Hĩtepekana apia pẽtauata hĩsãkire iaõka himakamakani xika. ⁵Ininiākara ninirekari ninoa aĩtariakori sini hĩtemoni nota ereẽ napokini apisapanika. Ninoa moianatai txineiro kaiãopokoro hĩsikaenetakito hãpotiitini ĩkapani. Ininiã napokasaaki ereẽ, iposope hĩsikakito nanikini. Ininiã iuasaaki aimarotariko kinirão sikaenetaka hinakito txineiro. Iuasaaki aimarotariko hĩpoxokoniritika hĩsikiniro hĩtxineirote.

Takari Itori Auini

⁶Ia nisãkire hĩxinika. Poiãoka komiri pitakiniã pitakarauatakasaaki, poiãonoka iri pimaporoka. Kaiãopokori pitakiniã, kaiãopokori pimaporoka. ⁷Ininiã pãkixinireẽ pixinikari atão pisikakiti ãtimoni. Kona erekari pimanirekasikatakainiti pisikini. ãti itapararitika paniãtiniãĩ pisikarauatini, !apakata. Teoso apokaerekatari kãkiti ipoxokoniritika isikarauatini ãtimoni. ⁸Teoso posotari ikinipoko erekari isikinii hĩte, ininiã ikiniõtika ikini sereti hiamonitakiti auiniã, hãpakapari ikinika hinireẽkiti. Ininiã ikinipoko erekari hĩkama. ⁹Teoso sãkire iõkatsopatakorĩ txari:

Teoso sikari itori erekari matxineirotenimoni. Teoso kamakiti atão inakari !ixipoka. Auapikako.

¹⁰Teosora sikari takariki katakarerimoni itakarauatini ĩkapani, ininiã eereka iposope inakasaaki, auari kienatxi inikakiti ĩkapani. Iua atokokana Teoso sikari kaiãopokori takariki hĩtemoni. Iua

anekakari hĩtakare, ininiã eereka iposope inakasaaki, kaiãopokori auari, ininiã kaiãopokori hĩkamakiti atão inakari apanakinimoni. ¹¹Teoso sikai ikini sereti erekari, ininiã ikinipoko auape hĩtemoni. Ininiãkara kãkiti mauarenimoni hĩsakariko kaiãopokori. Ate anikasaakiro hĩsikkakito apanakinimoni, ninoa txariko: “Peerekari Teoso, kotxi ninoa sikaua ate aamonitakiti,” itxanako.

¹²Ikara atoko inakari hĩkaminiã, hĩsikari Teoso nakitiakori amonitakiti ninoamoni. Apaka hĩsikasaakiri hĩsikkakiti ninoamoni, ninoa kaiãopokori txari: “Peerekari Teoso,” itxanako. ¹³Ninoa poxokoniuaatako, kotxi hĩte sikari kaiãopokori ninoamoni, apanakinimoni apaka. Ninoa txariko: “Peerekari Teoso,” kotxi imarotarina erekari hĩte kamakiti. Imarotarina hĩte kaminiri Kristo paniãtakiti iaõka. Imarotarina hĩte atão auikiniri Kristo iokanapirena erekari. ¹⁴Ininiã ninoa misãkiretari Teoso hĩte ĩkapani, kotxi iteene ninoa tiretai hĩte, kotxi Teoso sikari ikinipoko erekari hĩtemoni. ¹⁵Matxari Teoso: “Peerekai pite, kotxi pite sikaua pamarite. ãti pisikkakiti iua atoko inakari !auari.”

Paoro Apakapapiretari Apoĩtiko

10 ¹Kataparaxinireri Kristo, iuaritika ianaka õtãkikari kãkiti, ininiã nota Paoro ianaka nõtãkikai. Txamari apanakini hĩte sauaki auakani txari: “Paoro ĩtakoxiti auakasaaki, itapararitika itxitaua ate, atemoni iõkatsopatakasaaki. Txamari iua atekata auakasaaki, ipĩkarauata amaerekani isãpiretiniua,” itxana. Ikara apanakini sãkire na atão, kotxi ĩtakoxiti nauanãta, iuaritika amaãtiki nõtãkikai hĩte. ²Kona ninirekari noerekinii hĩte apanakini nitxitini ereẽ napokasaaki. Niposotapitikari nitapararitika nitxitiniri apanakini ereẽ napokasaaki, kotxi ninoa txari: “Paoro kamakiti Teoso sãkire mauĩãkani kamakiti atoktxikana,” itxana. Txamari na atão ninoa sãkire. ³Aĩto tapara poiãoka, kotxi kãkiti atxaua, ininiã aĩto taparaã !apakata anaiatiniri maerekati. Teosora sikataparataua aãkixinireẽ, maerekati anaiatini ĩkapani. ⁴Ate ikeeko kona Xesosi sãkire mauĩãkani ikeeko atokoni. Teoso ikeeko isika atemoni. Kaposotiireri Teoso ikeeko, ininiã aposotari Satanasi kamakiti axipokini aiko kaikori axipokini atokokana. ⁵Kãkiti iuikaua. !Nirekarina auikinirina Teoso imarore. “Paimatireua ate,” itxanãtana. Teoso sikaimaroretãu ate, ninoa sãkire paxirari inini aõerekini ĩkapani. Ikinipoko axinikkakiti anireka Kristo nireẽkiti iaõka axinikini, ininiã axinikkakiti

ãtião auiniã, atxĩkitakari iua axinikakiti imamakini Kristo nireẽkiti iaõka inini ĩkapani. ⁶Hĩte iteene kamakasaakiri Kristo nireẽkiti iaõka, ate misiritariko kãkiti ereẽ Kristo nireẽkiti imakamakanisaaki.

⁷Hĩte xinikari hãtamatakitinoka. Kona hĩxinikari kãkiti ãkixinireẽ auakari. Kãkiti ereẽ uãkatiniãri Kristo nakiti ininiuana, erekari imarotinirina ate apaka Kristo nakitiakori aniniuua, ninoa Kristo nakiti ininiuana atokotxikana. ⁸Atxĩiti iteene niuikari Apiananiri sikaposotiiretiniua ate, iuaritika kona nipẽtauata niuikiniri ikara, kotxi Apiananiri sikaposotiiretaua ate, hĩte akamataparaxiniretini ĩkapani. Kona ate nirekari hĩte ãkixinire tapara poiãõãpotini. ⁹Kona ninirekari hĩpĩkarauatini, iõkatsopari niokanatsopatakiti hãtatsopatini xika. ¹⁰Apanakini txari: “Paoro txitaua itapararitika iokanatsopatakitiã, txamari iua atekata auakasaaki, isãkire ãtião. Iuasaaki kona kataparaxinireri iua. Iuasaaki ipĩkarauata ate itxitini,” itxana apanakini. Na atão ninoa sãkire. ¹¹Itakoxiti ate auakasaaki, asãkire aiokanatsopatakiti iuatxikana asãkireta, ereẽ hĩtekata aãuakasaaki.

¹²Ninoa ate misãkirepiretakani iteene iuikaua. Atauako ninoa apiaerekata? Atauako !erekaua ate? !Kĩĩkitena ninoa. Ninoa uãkatari ninoa kamakitinoka erekari inini, ininiã ninoa iaõtari apanakini kamakiti. Apanakini kamakiti ninoa kamakiti atoko ininiã, ninoa uãkatari apanakini kamakiti apaka erekatxikana. Txamari na atão.

¹³Atepekana, kona ate iuikari ateka kamakiti. Ate iuikari parĩkatxi Teoso sikakiti atemoni akamini ĩkapani. Iuanoka ate iuika. Iua paniãtaua aparĩkauatini hĩte ĩkapani. Iua aparĩka ate iuikapitika.

¹⁴Teoso paniãtakitinoka akama. Ia aparĩka, ininiã ate sari hĩtemoni Kristo iokanapirena erekari asãpiretini ĩkapani. Ininiã apakatapitika ate iuikiniri ikara aparĩka. ¹⁵Apanakini parĩka Teoso ĩkapani ate kona txari: “Iua parĩkatxi ate kamakiti,” kona atxa. Ate nirekari hĩte auikaãpotiniri Kristo sãkire, Kristo sãkire iteene hãuikini ĩkapani, ininiã ate nirekari aparĩkauatini Teoso ĩkapani hĩte auiniãtaã, Kristo sãkire apanakini auikini ĩkapani. ¹⁶Ate nirekari Kristo iokanapirena erekari asãpiretiniri kãkiti, hĩte tixine apiko auakani Xesosi sãkire masãpiretakotipanika ininiãtaã. Ininiã kona aparĩkauata apanakini parĩkauatiniãtaã. Ininiã apanakini parĩka: “Ate parĩkakara iua,” kona atxari.

¹⁷Teoso sãkire iõkatsopatakori txari:

Pinirekatari piuikarauatini? Pinirekiniãri, ininiã piuikariko Apiananiri kamakitinoka.

¹⁸Teoso kona apokaerekatari kâkiti iuaka, “Erekapitikano,” inakari. Teoso sâpiretiniãri: “Erekapitikari iua kâkiti,” ininiã Teoso apokaerekatari iua.

Teoso Maiokanatakini

11 ¹Atxiïti miïkiteti sâkirauatini atoko nimisâkiretai hîte, iuaritika hãuiritano nota. ²Teoso nirekinii hîte iua nakitiakorinani hininiua, iua atokotxikana nota nirekai hîte Teoso nakitiakorinani hininiua. Nisikaenetai Kristomoni hîtaniri atoko inini ïkapani. Iuamoninani nisikaenetai. Ninirekari iuamoni nisikinii, âtokoro kikikata masirïkakato atoko inakaro. ³Kitxakapirïka Satanasi auaiïtotari imini. Iua imini misirienetaro Eva, kotxi paimatireri Satanasi sâkire. Nipïkari Satanasi misirienetini hîte apaka, ininiã eereka hixinikakiti na atãoni. Nota pïkari Xesosi hîtakanapini. Mitxi iteene hîtiretari iua. Iuananira hîtireta. ⁴Kotxi hîte apakapari hïpoxokoniritika ikinimane ereë apokakani, “Ate Xesosi sâkire sâpiretakaniua” inakani, txamari Xesosi pirena ninoa sâpiretakiti na atãoni. Kona ate sâpiretari ikara atoko inakari, iuaritika hãuikari ninoa sâkire. Hãuikasaakiri ninoa sâkire, atxiïti hãpakapari matamatakoti, txamari kona hãpakapari Erekar Matamatakoti ate sâpiretakiti. Ate sâpiretai hîte atão Kristo iokanapirena erekari, txamari hîte auikari âtião.

⁵Hîtemoni, Teoso iokanataka ninoa kâkitimoni. Hîtemoni, ninoa Teoso iokanatakini apiarini. Nota poião atxiïti? Ninoa apiata atxiïti? Konapitini. ⁶Atxiïti kona nota iteene imarotari nisâkirauatini, iuaritika nimarotapitikari Teoso sâkire. Himarotapekari ikara atoko inakari, kotxi asâpiretapekai.

⁷Teoso iokanapirena erekari nisâpiretakasaakii hîte, maxikatiïka nisâpiretai. Kona ninirekari hiïkitxitinino, ininiã nota poiãotakaua, hîte atão inakari himarotini ïkapani. Ikara atoko nikerokatari atxiïti? ⁸Hîtekata niparïkauatakasaaki, kâkiti âtiãtaã Xesosi sâkire auiaïkani iokanataro txineiro notamoni, txamari kona nota moianatana ninoa iusaaki. Hîtekara nimoianata iusaaki. ⁹Hîtekata nauakasaaki, nota nirekamaro txineiro. Txamari kona nota amanaã hîtxineirote. Aïtariakori Masetônia tixinikini mininano itanapoko niamonitakiti. Iua atokotxikana kona namanaãpaniro hîtxineirote nota ïkapani, kotxi atxiïti nota minari atoko nitxa hïporikiã. Kona ninirekari ikara atoko inakari nininiua. ¹⁰Kristo atãonoka isâkire. Isâkire nâkixinireë auape, ininiã nota sâkire apaka atão. Nisâpiretapanikari kâkiti hîtxineirote

nimanirekakani pirena. !Auari ikara nisãkire iotokakakari ikinika Akaia tixiniã. ¹¹ Kinirepa ikara atoko nitxa sãkireta? Atxiĩti kona nitiretai hĩte? Teoso imarotari nota iteene tiretinii hĩte.

¹² Uatxa iuaĩkana nisãpiretai hĩtxineirote nimapakapakani. Nanera kãkiti uatxa hĩtekata auakani Teoso maiokanatakini txari: “Ate kamari Paoro parĩkatxikana,” itxana. Ikara atoko ininiã iuikauana. Txamari ninoã parĩka ãtiã, kotxi ninoã apakaparo hĩtxineirote. Ate kona apakaparo hĩtxineirote. ¹³ Teoso kona iokanatana nanera hĩtemoni. Na atã Teoso iokanatakini !itxauana. Imisirienetaina hĩte, “Aparĩkauata Teoso ĩkapani,” inakasaakina. Nanera txari: “Kristo iokanatakiniraua ate,” itxana. Txamari na atã nanera sãkire. ¹⁴ Ikara atoko inakari auapitika, kotxi Satanasi sari kãkitimoni. Itxari: “Nota Teoso nitiri nitxaua. Nota oerekai atã inakari.” Ininiã iua sãkire auiãkani auapitika. ¹⁵ Ininiãkara nanera kikiakori Satanasi nitiriakori txari: “Atã inakari kamakaniua ate. Teoso nitiriakori atxaua,” itxana. Xipokatxi õtisaaki imisiritaãkanako ninoã maerekati ikamakitina xika.

Paoro Misiritiko Pirena

¹⁶ Iuaĩkana nisãpiretai. Miĩkiteti !nitxaua, iuaritika hĩte potxitari kãkiti miĩkiteni, ininiã miĩkiteti atoko niuikaua, kotxi nota posotari niuikiniua. ¹⁷ Apiananiri kona sãkirauata ia atoko. Miĩkitetinoka sãkirauata ia atoko iuikiniua. ¹⁸ Nanera kikiakori iuikaua, Teoso sãkire mauĩãkani iuikiniua atokokana, ininiã nota apaka sãpiretari niuikiniua. ¹⁹ Hĩte auiritari kãkiti miĩkiteni himoianarini ininiua, kotxi !kiĩkitei hĩte. ²⁰ Nanera hĩtekata auakani txĩkitakai hĩte initiriakorina hininiua. Hĩte auiritari ikara atoko inakari. Nanera amanaããpotari ikini sereti hĩte nakiti. Ikamarina inireẽkitina hĩtemoni. Ipaniãtaina ikiniõtika inireẽkitina hĩkamini. Imisiritaina hĩte. Hĩte auiritari ikara atoko inakari ikaminina. ²¹ Erekari nipẽtauatini atxiĩti? Kotxi kona kataparaxinireno nota nanera kamakiti atoko nikamini hĩtemoni. Kataparaxinirena nanera.

Ikamakitina iukana, ininiã miĩkiteti atoko kataparaxinireno nota. Nikamakiti niuikako. ²² Nanera Epireoakorikani? Ari. Nota apaka Epireo nitxaua. Nanera Isaeo apika mekaniriakorikani? Ari. Nota apaka Isaeo apika mekaniri nitxaua. Nanera Aprão apika mekaniriakorikani? Ari. Aprão apika mekanirikanarano nota apaka. ²³ Nanera Kristo nitiriakorikani? Atxiĩti. Miĩkiteti iuikiniua atoko nitxa: “Kristo nitiri apiaerekatakari nitxaua nota.” Nota apia

parĩkauata Teoso ĩkapani. Apiata nimisiritiko, kotxi kaiãokatani kateia ãki nitakaãka. Kaiãokatani nota noropataãka aãpitsaã. Kaiãokatani nipinaarita. ²⁴Ipi ipi ãti pakinikata Xoteoakori noropatano aãpitsaã. Iuasaaki inoropatanona trĩta novi pakinikata. ²⁵Ipi ãti pakinikata Homanoakori noropatano aãkeẽ. ãtikata kai soroã nikiporonakaãka. Ipi ãti pakinikata maporoã nisikasaaki, maporo sakika apanĩkakiã. ãti ĩkanõkati, ãti pokamarariti pakini ninapa potxoari uiniti nipimakaãtini. ²⁶Nianaxititapika. Natamonõkonitari uini torõkani. Natamonõkonitari kiĩtiririni. Natamonõkonitari ninirimane. Natamonõkonitari ninirimane minakanuia. Natamonõkonitari sitatxi nauakasaaki, kãkiti mauakaniãtaã nauakasaaki, potxoari uiniti nĩpiriãtakasaaki pakini. Natamonõkonitari kãkiti, “Xesosi sãkire aãuika” inakanikata nauakasaaki, kotxi na atão ninoa sãkire. ²⁷Kaiãokatani nisãpaka itori parĩkatxi xika. Kaiãokatani nitsii aua. Kaiãokatani kona apakata nimakini ĩkanõka. Kaiãokatani ninatxita, niposonata. Kaiãokatani nipokori !auari. Kaiãokatani nimĩteenekari katxĩkareri. Kaiãokatani nimãka !auari. ²⁸Ikara atoko inakari monõkari auapika notamoni. Apaka niparĩka kasãpaniri aua, kotxi ikiniõtika niparĩkauata kãkiti Teoso misãkiretikoãtaã apotiitakanuia ĩkapani. ²⁹ãti iõkapetiniã, nota apaka niõkapeta. ãti txĩkitakaãka maerekati ikamini, ininiã nota maerekaxiniretinoka nitxa.

³⁰Hĩte nirekiniãri niuikiniua, ininiã niukari niõkapere. ³¹Aãũite Xesosi Kristo iri, Teoso imarotari nisãkire atão inini. ãtipirika matxari: “Peerekai.” ³²Tamásiko sitatxiti nauakasaaki, kãkiti auĩte apiari Areta inakori auakasaaki, Tamásiko auakani auĩte paniãtari sotatoakori kaikotini sitatxi kãkiti ĩronakiniãtaã nota imaĩkinina ĩkapani. ³³Txamari kona nota pokĩka sitatxi toreãtaã. Nĩroã kotari mitari ãki. Iuasaaki aĩtariakori iokatxakano aapokotxi sonaã sitatxi pirikere mapara. Ixitipe apoka nitxa. Ikara atoko itxa nimatekini, ininiã kona ninoa maĩkano iuasaaki.

Taponetxi Teoso Sikiniri Paoro

12 ¹Hinirekatari apikomoni niuikiniua? !Apakata, iuaritika hinirekiniãri, niuikapanikauako, kotxi Apiananiri sikano taponetxi peereri. Iua oerekano imarore. ²Akokaxiti katosi anokanani inakasaaki, nanikaãka Teoso tixinemoni iaxiti apiko nopinixiti. Iuasaaki nitaponeuataako? Atxiĩti niĩto atão anikaãkauako? Kona iteene nimarotari. Teosonokara imarotari. ³Ianoka nimarota.

Nanikaãka Teoso tixinemoni nitaponeẽ atxiĩti, atão niĩto anikaãka atxiĩti. Teosonoka imarotari. ⁴Iuaxiti nikenakotari sãkiretxi erekari. Ikara kona nimarota iuaĩkana nisãpiretini. Apaka !auritaãka nisãpiretiniri kãkiti. ⁵Ninirekiniãri, niuikari nitapone ikara atoko inakari, txamari !apakata notaka niuikiniua. Niõkaperenoka niuika. ⁶Ninirekiniãri niuikiniua, atãonoka nisãpireta, kotxi kona miĩkiteti !nitxaua. Txamari kona ninirekari niuikiniua, kotxi atxiĩti kãkiti uãkatari nota apiari nininiua. Ninirekari kãkiti atão imarotinino. Erekari kãkiti imarotinino nisãkireẽ, nikamakitiã pakini.

Paoro Misiritiko Inako Tsii

Atoko Inini

⁷Peerekari nitikakiti Teoso tixine nanikikosaaki, iuaritika Teoso kona nirekari niuikiniua, ininiãkara Teoso auiritari Satanasi misiritinino niĩtoã. Katsiiri. Inako atoko itxa niĩtoã, ininiã niuikiniua !auari. ⁸Ipi ãti pakinikata namanaãri Apiananiri ia nitsii imaktxakini. ⁹Txamari itxano: “Kona nimaktxakari. Ikinipoko erekari nisikakiti sikataparatai. Iuanoka pinireka. Piõkapetakasaaki, nota tapara pãkixinireẽ apiata,” itxano. Ininiãkara nipoxokoniritika niuikari niõkapere, kotxi iusaaki nimarotari Kristo posotiire nãkixinireẽ auini. ¹⁰Niõkapetakasaaki, nipoxokoniua. Nixiniketikosaaki, nipoxokoniua. Nimaxikikosaaki, nipoxokoniua. Nimisiritikosaaki, nipoxokoniua. Nikamakiti tĩkane nimimarotakanisaaki, nipoxokoniua. Ikara atoko inakari nimĩteeneka nipoxokoniritika, kotxi Kristo nakiti nitxaua. Niõkapetakasaaki, nitapara nãkixinireẽ apiata.

Paoro Nirekari Erekari Koríto Auakanimoni

¹¹Miĩkiteti sãkirauatini atoko nisãkirauata, txamari hĩte xika nisãkirauata miĩkiteti sãkirauatini atoko, kotxi hĩte iuikaãkamanoko nota, kona nota nirekamariko niuikiniua. Minakati nitxaua, iuaritika nanera Teoso maiokanatakini hĩtekata auakani kona apiaerekata. ¹²Hĩtekata nauakasaaki, nikamakiti oerekai atão Teoso iokanatakiti nininiua, kotxi iusaaki noerekai Teoso oerekakiti kãkitimoni. Noerekai kãkiti maposotakinini. Noerekai posotiiretxi iusaaki. !Asãpaka ikara atoko inakari aõerekinii hĩte. ¹³Atxiĩti apiata nitiretatari apanakini Teoso misãkiretikoãtaã apotiitakaniua ãtiãtaã auakani? Konapitini. Ninoa nitiretini atoktxikana nitiretai hĩte. Namanaãna ninoa txineirote

niamonitakiti ĭkapani. Hīte txineirote kona xatiki namanaāi, ininiā nikerokatari atxiīti? Himaxinīkaretariko ia nikerokakiti.

¹⁴Ipikata nisipeka hītemoni. Naiamatapeka iuaīkana hītemoni nisini tīkane. Kona hītxineirote kona namanaāpanii. Hītxineirote kona ninireka. Hītera ninireka. Amarini kona nīkatana iri, inoro pakini. Iri, inoro pakinira nīkatana imiakori. Nota hīri atoko nitxaua. ¹⁵Nipoxokoniuata ikinika nota nakiti nisikinii hīte. Notaka nisikaua hītemoni. Nipoxokoniritika nisikai. Txamari nota tiraōki hīte ĭkapani apiaāpotakasaaki, hīte tiraōki nota ĭkapani poiāoāpota.

¹⁶Atāokani ikara atxiīti? Iuaritika ia nimarota. Kona xatiki namanaāi hinakiti hīsikinino. Atxiīti āti ereē auakari txari: “Paoro misirienetaua ate. Paxirari isākire,” itxa atxiīti. Txamari ikara na atāo. ¹⁷Natokopa nitxa nimisirienetini? Atauako kikiakori hītemoni nota iokanatakini misirienetai hīte? !Imisirienetaina. ¹⁸Nōtākikari Txito hītemoni isini tīkane. Nipaniātari āti aītari iuakata isini. Atauako Txito misirienetai hīte? Konapitini. Erekari Matamatakotira anikano nota. Iua apaka anikari Txito. Nota sari Xesosi nirekinimoni. Txito apaka sari iua nirekinimoni.

Paoro Pīkare

¹⁹Atxiīti hīte xinikari ikara asāpiretai, ate ereka anini himarotini ĭkapani. Konapitini. Ate sākirauata hītekata Kristo sākirauatini atokokana, kotxi Teoso atamataua. Ate tirketakini hītxaua hīte, ininiā ikinipoko akamakiti akaminii hīte, hīte ākixinire tapara auini ĭkapani. ²⁰Nipīkarauata ereē napokini, kotxi atxiīti hīte kamari nimanirekakiniti. Atxiīti napokasaaki ereē, kona hīte apokaerekatano nota. Ereē napokasaaki, nipīkari nimarotini hīte txitakakiniua, hīxikotakakiniua, homanatakakiniua, hīpotxinani auini, himisākirepiretakakiniua, aāpirena hīsāpiretini, hīuikiniua, hineenamauatini. Ikara nimarotini nipīka, ereē napokasaaki. ²¹Ininiā hītemoni napokasaaki, nipīkari Teoso kamapētatinino nota hīte maerekani xika. Nipīkari nitxiapatini maerekati hīkamakiti xika, kotxi kaiāopokori kamari maerekati akokaxiti, iuaritika !itakanapapanikari iua maerekati. Ixinikakitina maerekatinoka. Maerekati ikini sereti iītona nireēkiti aua. Ītanoro minakotokatika isirīkana. Ikara atoko inakari kona itakanapapanikana.

Paoro Sākire Imapotōkire Ōtākikare

13 ¹Iplikata nota sari hītemoni. Iuaĩkana hītemoni nisako. Teoso sākire iōkatsopatakori txari:

Ipi āti pakini kākiti atamatiniāri maerekati āti kamakiti, ninoa sākire auikaāka, ininiā iua maerekati kamakari misiritaākako. Ipi kākiti atamatiniāri maerekati āti kamakiti, ninoa sākire apaka auikaāka, ininiā iua maerekati kamakari misiritaākako,

itxa Teoso sākire. ²Akokaxiti hītekata nauakasaaki, nōtākikapekai himaerekani hītakanapini. Iuasaaki nōtākikana mitxi maerekati kamakani, apanakini apaka. Nitxana: “Ātikata uai napokasaaki, nimisiritapitikari ikinimane maerekati kamakani,” nitxapekana. Iuaĩkana uatxa itakoxiti nauakasaaki, ikara nisākiretxikana nisāpiretai hīte. ³Hīte nirekari himarotiniiri: “Atāokani atxiīti Paoro sāpiretari Kristo sākire?” hītxa. Napokasaaki ereē, himarotapitikariko atāo nisāpiretiniri Kristo sākire. Kristo liōkapeta. Oerekepekai iposotiire hīte sauaki. ⁴Kristo okikosaaki aamina ĩpiriāmitakari nopini, iito iōkapere aua. Uatxa kataparari iua, kotxi Teoso sikataparatarari iua. Ate ĩto apaka iōkapeta, mitxi Kristo ĩto iōkapetini atoko, iuaritika Teoso sikataparataua Kristokata aāuini hīte amoianatini ĩkapani.

⁵Hīxinikariko hākixinireē auakari. Atāokani hāuikatari Teoso sākire? Hīteka ataerekatauako. Himarotatarari Xesosi Kristo hākixinireē auini? Teoso sākire hākixinireē mauakaniā, Kristo Xesosi !auari hākixinireē. ⁶Ninirekari himarotiniiri Kristo Xesosi auini ate ākixinireē. ⁷Ate misākiretari Teoso, maerekati hīte makamakani ĩkapani. Kona ate nirekari kākiti sākire: “Peerekari Paoro. Iua imarotapitikari Teoso sākire oerekini, kotxi Korĩto sitatxiti auakani kamari Teoso sākire iaōka.” Ikara kona ate nireka, ate iuikiniua ĩkapani. Atxiīti kākiti uākatari Xesosi Kristo !auari ate ākixinireē, iuaritika ate nirekari hīte kaminiri atāonoka. ⁸!Apakata aiotokakiniri atāo inakari. Atāo inakari auapika. Atāo inakari lixipoka. Apakata aōerekiniri atāo inakari. ⁹Atxiīti ate iōkapeta, iuaritika apoxokoniuaata hītaparaxinire akenakoenetakasaaki. Ate misākiretari Teoso hīte atāonoka hīkamini ĩkapani ikiniōtika, Xesosi sākire iaōka hīkamini ĩkapani.

¹⁰Ikara atoko inakari niõkatsopata hĩte ĩkapani hĩtekata nimauakanisaaki, kotxi ereẽ napokasaaki, kona ninirekari nitxitinii hĩte. Niposotapitikari nitxitinii, kotxi Apiananiri sikaposotiiretapekano atão nikamini hĩtemoni. Txamari kona ninirekari Xesosi sãkire hĩtakanapini, nota txitinii xika. Ninirekari hĩte kataparaxinire hinini, Xesosi sãkire iteene hãuikini ĩkapani.

¹¹Nitariakori, xipope niõkatsopare. Ereẽpiko. Ikiniõtika atãonoka hĩkamako. Xesosi sãkire iaõka hĩkamako. Hĩkamariko nisãpiretakiti iaõka. Hĩxinikakiti ãtinoka itxauako. Kona hĩtxitakakapeua. Ininiãkara Teoso katiraõkiri, kauãreri, auapikako hĩtekata.

¹²Haõkitakakasaakiua, hĩpoxokoniritika hãpakapakakauako, kotxi Apiananiri nakitiakori hĩtxaua.

Ikinimane Teoso nakitiakori uai auakani xinikamanapitai hĩte.

¹³Apiananiri Xesosi Kristo sikari ikinipoko erekari hĩtemoni. Teoso iteene tiretai. Erekari Matamatakoti moianatai hĩte hĩkinika. Ameẽ.